



性命中起大湧的彼一冬

淑芬個翁仔銀行做主管，有一工，風邪、頭疼、流鼻水，掠準家己的身體猶足勇健，平常時仔逐工攏有咧運動、拍球，略略仔寒著，清彩買便藥仔食食咧就好。無疑悟幾工後煞頭眩目暗、跤痠手軟、四肢無力，就緊共送去病院。醫生講著愛隨入院急救，啥人知影過無個外月就來過身去。

這件代誌予六十歲的淑芬按怎都料想袂到，雄雄毋知欲按怎才好。彼站伊艱苦甲袂食袂暍，規個月無代無誌就會腹肚疼，有時閣無緣無故會腰骨痠疼、心臟嘔嘆、血壓衝誠懸。定定半暝仔咧反症，就緊坐計程車去病院掛急診。隨看著醫生，病就好矣。醫生檢查幾若擺嘛捎無頭摠。轉去到厝，不時上班三、兩工就喝欲退休，同事攏嘛有家己的家庭愛顧，無才調一日到暗來共安搭。

彼陣個主管想著一个步數，成立「考證照團隊」，鼓勵逐家參加電腦證照考試，先爭取訓練所開『word』初級班。自按呢淑芬的生活開始有目標，下班了後一直練習考試題目，就算歇暍日同事攏無來上班，伊家己一个人嘛足綿爛去辦公室繼續練習，考前一個月閣去報名參加『word』進階班。知影有過關彼工，伊隨敲電話予個主管，那笑那哭講：「我考過矣！我考過矣！」

淑芬共人講，伊規世人上蓋大的改變就是對提著人生頭一張證照彼年。會記得頭一擺勞委會丙級電腦技術士的考照，伊學科題目都猶未看清楚咧，真濟少年仔十五分鐘內就交矣。繼落去考術科的時，彼寡少年仔擲字盤有夠緊，伊嘛去予拍生驚著。仔參加乙級電腦技術士的時，監考老師閣對伊講：「考生家長請離開教室，請你去外口等。」害伊歹勢甲！

自九十八年開始，雖罔歲頭有矣，毋過伊嘛真巴結，一路過關。頭尾三冬，總共提著二十張電腦證照，變甲誠專業，規个人充滿自信，行路都有風。

工商日報仔一百年八月有做專訪，報導伊認真學習，毋驚失敗的故事，鼓舞真濟人。同事攏共伊呵咾，嘛綴伊的跤步，互相勉勵，食一歲、學一歲，享受終身學習的快樂。

作者：蔡惠芬

☆詞彙學習☆

【風邪】hong-siâ：受到外界風寒溼熱侵身，引起的各種疾病，多指傷風感冒。

【無疑悟】bô-gî-ngōo：又唸作 bô-gî-gōo。不料、想不到。

【反症】huán-tsing：指病情轉好又惡化的轉變。

【捎無頭摠】sa-bô-thâu-tsáng：摸不著頭緒。

【綿爛】mî-nuā：專注認真，堅持到底。

【拍生驚】pah-tshenn-kiann/phah-tshinn-kiann：驚嚇。

【巴結】pa-kiat：上進努力，堅強不示弱。